

# Topsfield

I.

Forniers, per mos enseignamens,  
auch dir, q?etz sai a mi vengutz;  
e pois Dieus fai per vos vertutz  
qe·us voletz partir dels sirvens,  
be-is taing assatz  
que apredatz  
cum vos formatz  
entre·ls prezatz  
e que siatz  
bos chantaire.

II.

Ops vos er tot primieiramens  
c?oblidetz lanss? e dartz agutz;  
ospitals e monges tondutz  
e totz homes obediens  
asseguratz  
que no·ls prendatz;  
jazers els blatz  
si? oblidatz  
ab mains pechatz  
que fai laire.

III.

Los laitz deschausitz sagramens  
qe faziatz, qand eratz nutz  
delonc lo taulier remasutz,  
e los vilans motz recrezens,  
amics, laissatz,  
qe no·ls fassatz  
ni no·ls digatz;  
que grans pechatz  
es, so sapchatz,  
a retraire.

IV.

Ancar non sai vas cal dels vens  
iretz, tro que siatz mogutz,  
mas ben vuoil qe·m portetz salutz  
a·N Raimon Drut q?es tant valens;  
que s?i anatz,

segurs siatz  
q?encavalgatz  
vos en partatz,  
anz qe iscatz  
del repaire.

V.

E si·us enquier dels vostres sens,  
amics, non estetz esperdutz,  
digatz q?a Lombers etz ahutz  
a N?Alazais q?es tant plazens,  
qe sa beutatz  
fai·ls fols e·ls fatz  
tornar senatz,  
e·ls plus menbratz  
outracujatz  
de vejaire.

VI.

Joglars siatz  
e meitadatz  
sens ab foudatz;  
c?om trop senatz  
entre·ls prezatz  
non val gaire.

VII.

Los pros lauzatz,  
e dels malvatz  
non retengatz  
lor amistatz,  
qe pieitz prendatz  
c?us trichaire.

- letto 233 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropaea.let.uniroma1.it/?q=laboratorio/topsfield-30>